

ԵՐԵՎԱՆԸ VII—IX ԴԱՐԵՐՈՒՄ

Պրոֆ. Թ. Խ. ՀԱԿՈԲՅԱՆ

VII—IX դարերը մեր մայրաքաղաքի պատմության մեջ առաջին հերթին հայտնի են նրանով, որ այդ ժամանակվանից սկսած նրա մասին գրավոր տեղեկություններն ու հիշատակություններն արդեն դառնում են անընդհատ, հնարավորություն տալով այս կամ այն չափով ամբողջական ձևով ներկայացնելու նրա պատմությունը:

Հայագիտությունը վաղուց արդեն նկատել է, որ Երևանի առաջին ստույգ հիշատակությունը մեր մատենագրության մեջ կատարվել է VII դ. սկզբին՝ Արրահամ կաթողիկոսի գումարած եկեղեցական ժողովի առնչությամբ¹, որի մասին «Գիրք թղթոցում» հատուկ վերնագրի տակ ասված է. «Եւթն ու տասնեորդ ամի Ապերուէդ Խոսրովու արքայից արքայի, իմ Արրահամու Հայոց կաթողիկոսի և աթոռակցաց իմոց... և ...իշխանաց և աշխարհականաց և ուղղափառաց առաջի կացեալ. Թէոդորոս սեպհական զնդին եպիսկոպոս... Յաւիտեան Աղիւարդայ, Դաւիթ Երևանայ, Իսմայէլ Գառնոյ, Յուհանէս Աւանի, Իսրայէլ Պողաւնից, Ջոջիկ Երևանից, Յոհանիկ Արտաւաղդայ Ապարանից, Արաս և Որդեակ և Արրահամ Փարպիոյ, Միքայէլ Աղցից, Գրիգորիս Արճոյ, Կոզմաս Ուրդայ, Մայէն միւս Արճոյ, Յոհանիկ Արծափայ, Սիմոն Դատ աւանից, Սամուէլ Բագարանի, և այլ վանից երիցամբ հանդերձ. եկեալ յանդիման մեր զբարեպաշտութիւն Խոստովանեցին, նշովելով նոյնաձևս ըստ երանելի հարցն մերոց զամենայն հերձուածողս, և ՂԱրիոս. և ՂՄակեղոն, և զՆեստոր, և զԵտիքոս, և զչար ժողովին Քաղկեդոնի, և զպիղծ տումարն Լեոնի, և աղաչանս մատուցանելով առաջի մեր, խառն/ա զինքեանս ի միաբանութիւն եկեղեցւոյ ճշմարիտ և աւատին Քրիստոսի»²:

Ընչպէս տեսնում ենք, Արրահամ կաթողիկոսն այդ ժողովը հրավիրել էր աղանդների, առաջին հերթին՝ քաղկեդոնականության դեմ պայքարելու նպատակով: Դրան մասնակցում էին եպիսկոպոսներ, տարրեր աստիճանի իշխանավորներ, երեցներ և այլ կարգի մարդիկ: Ժողովը գումարվել է պարսից Խոսրով II (Փարվեղ, 590—628 թթ.) թագավորի 17-րդ տարում, այսինքն՝ 607 թ.³: Այդ ընդարձակ հիշատակությունը կարևոր աղբյուր է նաև Հայաստա-

¹ Ղ. Ա ի շ ա ն, Այրարատ, Վենետիկ, 1890, էջ 299: Մ Ե Ս Ր Ո Վ Բ Ա Ր Բ Ա Յ Ի Ս Կ Ո Վ Ո Ս Դ Մ Բ Ա Տ յ ա ն ց, Տեղեկագիր Գեղարունի ժովադարդ զաւոռի, որ այժմ Նոր-Բայազիտ զաւառ, Կաղարչապատ, 1895, էջ 5: 2. Ս. Է Ֆ Ր Ի Կ յ ա ն, Պատկերազարդ բնաշխարհիկ բառարան, հատ. 1, Վենետիկ, 1903—1905, էջ 658: Ե Ր Վ Ա Ն Գ Շ Ա Տ Ա Ղ Ի Գ, Հին Երևանը, Երևան, 1931, էջ 68—69 և այլն:

² «Գիրք թղթոց», Մատենագրութիւն Նախնեաց, Թիֆլիս, 1901, էջ 150—151, Հմմտ. Ո ՚ Խ Ո Ս Ի Ն Է Ս Ե Վ Ի Ս Կ Ո Վ Ո Ս, Հատուած երկրորդ, Պատմութիւն բաժանման Վրացի Հայոց, էջ 63—67:

³ 2. Աճառյանը, հիմք ընդունելով Ուխտանեսն եպիսկոպոսի հիշատակությունը, ժողովի գումարման տարին համարում է 607 թ. (տե՛ս «Հայոց անձնանունների բառարան», հատ. Բ, Երևան, 1944, էջ 26), իսկ Մեսրոպը Սմբատյանցը այն զնում է 596 թ. տակ (տե՛ս նշվ. աղբ., էջ 5):

նի VII դարի վարչա-տերիտորիալ բաժանման, վանքերի ու եկեղեցիների և այլնի համար: Սակայն մեզ համար տվյալ դեպքում ամենից կարևորը Երևանի հիշատակման փաստն է ու նրա որպիսությունն անուղղակիորեն բնորոշող կողմնակի ակնարկները: Դրանում, ճիշտ է, Երևանի (ինչպես և հիշատակված մյուս շատ վայրերի) բնույթի, մեծության մասին ոչինչ չի ասված, բայց անտարակուսելի է, որ նրա հոգևորական ներկայացուցչի ներկայությունը ժողովին արդեն բնորոշում է նրա կարևոր և մեծ բնակավայր լինելը: Հենց միայն սոսկ հիշատակությունից ելնելով Ղ. Ալիշանը VII դ. սկզբի Երևանը համարում է «իբրեւ երեւելի աւան մի, զի ընդ պատուաւոր վաներիցունս կարգի և սորայս՝ Դավիթ անուն»⁴: Հետևելով Ղ. Ալիշանին, Հ. Էփրիկյանը, Ե. Շահազիզը և մի շարք այլ հայագետներ նույնպես այդ ժամանակվա Երևանը համարում են «երեւելի աւան»⁵: Ղ. Ալիշանի և նրա հետևորդների տեսակետի հետ կարելի է միանալ առանց տարակուսանքի: Դրա արժանահավատությունը մեր կարծիքով երևում է նաև նրանից, որ բացի վանքերից, գավառներից ու վարչա-տերիտորիալ այլ միավորներից, նշված եկեղեցական ժողովին ներկայացուցիչներ էին ուղարկված բացառապես միայն այս կամ այն չափով նշանավոր բնակավայրերից՝ ավաններից, գյուղաքաղաքներից և քաղաքներից (Օշական, Եղվարդ, Գառնի, Ավան, Արտավազդի ապարանք, Փարպի, Աղք, Արծափ, Դատ ավան, Բագարան և այլն):

Ինչ վերաբերում է նույն «Գիրք թղթոցի» մեջ հիշատակված «Ջոջիկ Երեւ վանից» արտահայտությանը, ապա Ուխտանես եպիսկոպոսի հիշատակության համաձայն⁶ այն պետք է հասկանալ «Ջոջիկ Արամունից» (այժմ՝ Արամուս գյուղ ՀՍՍՀ Արուվյանի շրջանում) ձևով, և Երևանին չի վերաբերում, ինչպես ժամանակին նկատել է բանասեր Ստեփան Կանայանցը⁷: Այնպես որ, ժողովին Երևանից մասնակցում էր միայն մի վանքեցի՝ Դավիթը:

Հաջորդ հիշատակությունը, որը բանասերների ու պատմաբանների մոտ՝ սկսած Հովհ. Շահխաթունյանցից և վերջացրած մեր դարի որոշ հեղինակներով, առաջացրել է տարակարծություն, դա Սեբեոսի հաղորդումն է արաբական արշավանքների և այդ արշավանքների ընթացքում Երևանի մոտ տեղի ունեցած կռվի մասին: Մինչև այդ հարցի քննարկումը վկայակոչենք Սեբեոսի համապատասխան հիշատակությունը.

«Եւ եղև ի գալ միւսում ամի եկն զաւրն Իսմայելի յԱտրպատական, և բաժանեցան յերիս: Առաջ մի յԱյրարատ, և առաջ մի ի Սեպհական գնդին կողմանսն, և առաջ մի յԱղուանիս: Արդ որք ի կողմանս Սեպհական գնդին արշաւեալ սփռեցան և հարեալ զամենայն կողմանսն զայնոսիկ սրով սուսերի, առին զաւար և զգերութիւն: Եւ եկին ժողովեցան ի յՆրեւան, և մարտեան ընդ բերդին, և ոչ կարացին առնուլ»⁸:

որը ճիշտ չէ: Լ. Մելիքսեթ-Բեկը դրում է, որ այդ ժողովը տեղի է ունեցել մինչև 602 թ., առանց ճիշտ թվականը նշելու (տե՛ս ՍՍՌՄ ԳԱ Հայկական ֆիլիալի «Տեղեկագիր», Երևան, 1940, № 4—5, էջ 118):

⁴ Ղ. Ալիշան, նշվ. աշխ., էջ 299:

⁵ Էփրիկյան, նշվ. աշխ., հատ. I, էջ 658: Ե. Շահազիզ, նշվ. աշխ., էջ 68—69:

⁶ Ուխտանես եպիսկոպոս, նշվ. աշխ., էջ 64:

⁷ Ստեփան Կանայանց, Անհայտ գաւառներ հին Հայաստանի, Վաղարշապատ, 1914, էջ 86, ծանոթ. 4:

⁸ «Սեբեոսի եպիսկոպոսի Պատմութիւն», Երևան, 1939, էջ 118:

Հաջորդ՝ ԽԳ գլխում Սերեոսը պատմում է, թե ինչպես է Թեոդորոս Ռշտունին իր զորքերով մարտնչել արաբների դեմ⁹:

Այդ էլ այն բոլորը, որ Սերեոսը հաղորդում է Վասպուրական (Սեպհական գունդ) և Այրարատ արշաված արաբական զորքերի գործողությունների ու Թեոդորոս Ռշտունու կողմից կազմակերպված դիմադրության մասին:

Արաբական այդ արշավանքն ըստ Ղ. Ալիշանի կատարվել է 642—643 թթ.¹⁰, ըստ Մեսրոպ Սմբատյանցի՝ 642 թ.¹¹, իսկ ըստ Հ. Մանանդյանի՝ 650 թ.¹²։ Ամենայն հավանականությամբ ընդունելի է Ղ. Ալիշանի և նրան հետևող Մ. Սմբատյանցի կարծիքը: 650 (ավելի ճիշտ 660) կամ 658 թ. կատարված արշավանքը, որի մասին խոսք կլինի մի փոքր հետո, հավանաբար ոչ մի առնչություն չունի Սերեոսից վերը մեջբերված հիշատակության հետ:

Մեր մայրաքաղաքի պատմության համար էական նշանակություն ունի այն հարցը, թե Սերեոսի հիշատակած «յերևանը» իրո՞ք Երևանն է, թե՞ «Առեստաւանը» կամ «Հերավանը» (Հերը, Խոյր): Թաղեոս Ավդալբեկյանը, 1926 թ հատուկ հոդվածով հանդես գալով, փորձել է Սերեոսի հիշատակած «յերևանը» նույնացնել Վանա լճի հյուսիս-արևելյան ափին եղած Առեստի կամ Առեստավանի հետ և, այդպիսով, ժխտել է Սերեոսի մոտ Երևանի հիշատակությունը: Նրա համար հիմք է ծառայել Սերեոսի հիշատակության միայն աշխարհագրական կողմը՝ Սեպհական գնդի (կամ «կողմի Վասպուրական գնդի»)¹³ ուղղությամբ արշաված արաբական զորախմբի հավանական ուղին¹⁴, առանց նկատի ունենալու, որ պատմիչը կարող էր արշավանքը նկարագրելիս խախտել հարձակման ենթակա բնակավայրերի թվարկման հաջորդականությունը, ինչպես այդ կարելի է նկատել ուրիշ պատմիչների ու աշխարհագիրների մոտ: Թ. Ավդալբեկյանը նկատի չի ունեցել նաև այն, որ Առեստավանը, ինչքան մեղ հայտնի է, այդ ժամանակներում բերդ կամ ամրոց չունեեր, նա չէր կարող դիմադրել արաբական զորքերին և անմատչելի մնալ նրանց համար: Իր ժամանակին Սերեոսի այդ հիշատակության վերաբերյալ որոշ կասկածանք է հայտնել նաև Հովհ. Շահխաթունյանցը¹⁵, բայց առանց մերժողական եզրուհանուման, ինչպիսին արել է բանասեր Թ. Ավդալբեկյանը, գրելով թե՛ «Սրանով (իբր հոդվածով—Թ. Հ.) Երևանի առման հիշատակության առասպելը չքանում է, սրա հետ միասին վերանում է Սերեոսի հիշյալ հատվածի կոպիտ հակասությունն էլ: Եվ որովհետև Սերեոսը մի ուրիշ տեղ ևս Երևանի անունը չէ տալիս, նշանակում է Սերեոսի «Պատմութեան» մեջ Երևանի մասին հիշատակություն չկա առհասարակ»¹⁶: Ակադեմիկոս Հ. Մանանդյանը պատմագիտական և պատմ-

⁹ Նույն տեղում, էջ 119:

¹⁰ Ղ. Ալիշան, նշվ. աշխ., էջ 299:

¹¹ Մ. Սմբատյանց, նշվ. աշխ., էջ 5:

¹² Հակոբ Մանանդյան, Հայաստանի գլխավոր ճանապարհները ըստ Պետինդերյան քարտեզի, Երևան, 1936, էջ 145:

¹³ Ղ. Ալիշանը (Այրարատ, էջ 420) և Ն. Աղոնցը (Армения в эпоху Юстиниана, СПб., 1908, էջ 318—320) համոզիչ կերպով ցույց են տվել, որ Վասպուրականն ու «կողմը Սեպհական գնդին» նույնն են:

¹⁴ Մանրամասն տե՛ս Թաղեոս Ավդալբեկյան, Բանասերի օրագրից, Երևանը Սերեոսի պատմության մեջ, «Հանդես ամսօրյա», Վիեննա, 1926, № 11—12, էջ 500—505, 587—590:

¹⁵ Հովհաննես Շահխաթունյանց, Ստորագրություն կաթողիկէ էջմիածնի և հինգ պատագն Արարատայ, հատ. 11, էջմիածին, 1842, էջ 134—135:

¹⁶ Տե՛ս «Հանդես ամսօրյա», 1926, № 10—11, էջ 590:

մա-աշխարհագրական առումներով մանրամասն վերլուծելով արաբական այդ զորաբանակի արշավանքի ուղղությունը, մերժում է Թ. Ավդալբեկյանի՝ Սեբեոսի հիշատակած «յերեւանը» «Առեստաւանը» համարելու կարծիքը¹⁷, բայց ինքն էլ այն համարում է «Հերի» (նրա մոտ՝ «Հերաւան») աղճատումը. «Երեւիւն» պարզ մի աղճատումն է, անշուշտ, վերոհիշյալ հատվածում (Սեբեոսի պատմության), սակայն ոչ թե «Առեստաւան» կամ «Երաստաւան», այլ «Հերաւան» տեղանվան»¹⁸. — եղրակացնում է նա:

Մեր կարծիքով անընդունելի է նաև Հ. Մանանդյանի տեսակետը: Այն նույնպես չունի պատմական ամուր հիմքեր: Նախ, մեր մատենագրության մեջ «Հերը» (հոյ) երբեք «Հերաւան» ձևով չի հիշատակվում, հետևապես այն ամենևին չի կարող շփոթվել «յերեւանի» հետ կամ «սղճատվելով» (որն ավելի անհավանական է) դառնալ «յերեւան»: Մեր V դ. պատմիչների մոտ «Հէրը» Զարեանդի հետ միասին հիշատակվում է որպես դավառ. «...չորեքտասաներորդ իշխանն Շահապն Զարաւանդ և Հեր դաւառի»¹⁹, «յանկարծակի գուշակ հասանէր առ Խոսրով ՚ի Հէր և ՚ի Զարաւանդ դաւառ»²⁰, «փախաւ ի կողմանս Հերայ»²¹, «Զգունդն առաջին հեռացուցի ի կողմանս Հերայ և Զարեանդայ»²², «և եկեալ հասանէր յաշխարհն Հայոց ի Հեր և ի Զարաւանդ դաւառ»²³, «Եւ յետ սաւաւ ինչ աւուրց անցելոց լուան, եթէ զօր եհաս բաղում ի Հեր և ի Զարեանդ դաւառ», «և երկրորդ՝ ասէին, թերևս անդէն ի տեղւոջն ի Հեր և ի Զարեանդ դաւառին վճարին ելք գործոյն պատերազմին», «եկեալ հասեալ են ի սահմանս Հերայ և Զարաւանդ դաւառի բաղում զորագլուխը», «և զայրուծին Հեր և Զարաւանդ դաւառի», «Եւ եկեալ Նիխոր յաշխարհն Հայոց՝ ոչ իշխեաց միջամխել ի Հայոց տեղիսս, այլ դադարեալ ի դաւառին որ կոչէր Հեր», «Եւ երթեալ նոցա առ Նիխոր ի դաւառն ի Հեր»²⁴:

Արաբական շրջանի պատմիչները նույնպես որևէ հիմք չեն տալիս «Հերը» «Հերաւան» կոչելու կամ դավառի փոխարեն ավան համարելու: Սեբեոսը Հերն ամենևին չի հիշատակում, Ղևոնդ Երեցը հիշատակում է մի տեղ, այն էլ որպես դավառ («և գայր հասանէր ի դաւառն Հեր»)՝, իսկ Շապուհ Բագրատունուն վերագրված պատմության մեջ և Հովհաննես Դրասխանակերտցու մոտ հիշատակվում է որպես քաղաք. «...այժմ ունիք զտերութիւնք Զարեանդ դաւառի և դաւանդ քաղաքն Հերայ», «...և եթէ կամիմ՝ այս աւր քակեմ պարիսպ Հերա և զերկիրն աւար հարկանեմ», «աջողեցաւ գնալն ի քաղաքն ի Հեր», «...դիմաւք չի պարտ քեզ երթեալ ի բոյն իժից, ի քաղաքն Հերայ», «...և տարան սպանած

17 Հ. Մանանդյան, նշվ. աշխ., էջ 144—147:

18 Նույն տեղում, էջ 146:

19 «Ազաթանգեղայ Պատմութիւն». Թիֆլիս, 1882, էջ 462:

20 «Փավստոսի Բուզանդացոյ պատմութիւն Հայոց», Վենետիկ, 1832, էջ 18:

21 Մովսէս Խորենացու հիշատակած «ի կողմանս Հերայ» արտահայտությունը հավանաբար պետք է հասկանալ ոչ թե «Հերը», այլ Հարք դավառը՝ Արածանիի ափերին:

22 «Մովսէսի Խորենացոյ պատմութիւն Հայոց», Թիֆլիս, 1913, էջ 158:

23 «Եղիշէի Վասն Վարդանայ եւ Հայոց պատերազմին», Երևան, 1957, էջ 75 և 105:

24 «Ղազարայ Փարպեցոյ պատմութիւն Հայոց եւ թուղթ առ Վահան Մամիկոնեան», Թիֆլիս, 1907, էջ 144—145, 147, 282, 351, 352, 357:

25 «Պատմութիւն Ղևոնդեայ մեծի վարդապետի Հայոց», Ս. Պետերբուրգ, 1887, էջ 134:

ի քաղաքն Հերայ»²⁶, «Ապա յաւուրս աշնայնոյն մեծ իշխանն շուէր գնայր զկողմամբ Հերայ ի հանդիպումն զխաւորի քաղաքին»²⁷:

Այսպիսով, V և հետագա դարերի պատմագիրներն մոտ «Հերը» «Հերայան» ձևով երբեք չի հիշատակված, «Հերը» երբեք նրանք ավան չեն կոչել, այլ դործածել են «գավառ» և «քաղաք» իմաստներով: Նույն այդ հիշատակություններից նաև պարզ երևում է, որ Ատրպատականից Վասպուրական տանող առևտրա-տնտեսական ու ռազմական ամենակարևոր ճանապարհի առաջին կայանը Հայաստանի սահմանադիսին Հերն էր: Սասանյաններն իրենց արշավանքներն այս կողմերով կատարելիս Հայաստան էին մուտք գործում Հեր և Զարեանդ գավառներով: Իսկ այդ գալիս է ժխտելու և՛ Թ. Ավդալբեկյանի այն ենթադրությունը, թե Վասպուրականում Սեբեոսի հիշատակած արաբական զորագնդի նվաճած կետը Առեստավանն էր, և՛ Հ. Մանանդյանի այն կարծիքը, թե նույն զորախումբը Վասպուրականում ավարառուական արշավանքներ կատարելուց հետո է միայն եկել «Հեր» (ներառաւով «Հերավան») ²⁸:

Եվ վերջապես, ինչու Սեբեոսին չհասկանալ ու շրջադնել այնպես, ինչպես ինքն է հաղորդում: Սեբեոսի պատմության ձեռագրերում, բացառությամբ մեկի, որ ունի «Հերեան» ձևը, արաբական նշված զորախմբի մարտերից մեկի վայրը համարված է «յերեանը», ինչպես միանգամայն ճիշտ կերպով նշում է նաև Հ. Ժամկոչյանը²⁹: Եթե այդ այդպես է, ապա VII դարի առաջին կեսին Երևանը, հնագույն ժամանակների նման, ուներ իր բերդը և էական դեր էր խաղում ռազմա-ստրատեգիական առումով:

Պատմական աղբյուրների մանրազնին ուսումնասիրությունը ցույց է տալիս, որ Սեբեոսի հաղորդումը VII դ. Երևանի մասին միակ հիշատակությունը չէ: Տարբեր աղբյուրներով նույն հարցին անդրադարձած հեղինակների մեծագույն մասն այն կարծիքին է, որ Սեբեոսի հիշատակությունն այդ դարի Երևանի մասին միակն է, և որ հետագայի մյուս հեղինակները՝ Հովհաննես Դրասխանակերտցին, Սամվել Անեցին և նրանցից առաջ ապրած Ղևոնդ Երեցը համառոտ կրկնել են Սեբեոսի՝ վկայակոչված հիշատակությունը³⁰: Իրոք որ Ղևոնդ Երեցը, նկարագրելով արաբական արշավանքները՝ որոշ տեղերում օգտվել է Սեբեոսից, բայց առանց նրան մեխանիկորեն կրկնելու: Այսպես, եթե վերանալու լինենք ժամանակագրական կարգի որոշ խախտումներից, դեպքերի հաջորդականության և աշխարհագրական անունների որոշ տարբերություններից, ապա լիովին նմանություն կարելի է տեսնել Սեբեոսից մեջբերված հատվածի և Ղևոնդ Երեցի հետևյալ հիշատակության միջև. «Ապա յետ այնորիկ յերեսուն և վեցերորդ ամի իշխանութեանն նոցա (արաբների—Թ. Հ.) դօր ժողովեալ դարձեալ յարձակեցան ի վերայ աշխարհին Հայոց. որոց էին գլխա-

26 «Պատմութիւն Շապհոյ Բագրատունւոյ», էջմիածին, 1921, էջ 67, 68, 69, 71:

27 Հովհաննես Կաթողիկոս Դրասխանակերտցի, Պատմութիւն Հայոց, Թիֆլիս, 1912, էջ 141:

28 Տե՛ս «Հանդես ամսօրյա», 1926, № 9—10, էջ 588—589, Հ. Մանանդյան, նշվ. աշխ., էջ 145—146:

29 Հ. Ժամկոչյան, Երևանը XIII—XIV դարերում, թեկնածուական դիսերտացիա, ձեռագիր, Երևանի պետհամալսարան, 1941, էջ 15—16:

30 Տե՛ս Հ. Շահխաթունյան, նշվ. աշխ., հատ. II, էջ 134—135: Մեսրոպ Սրմբատյան, նշվ. աշխ., էջ 5: Ի. Շահագիր, նշվ. աշխ., էջ 68—70: Հ. Ժամկոչյան, նշվ. աշխ., էջ 15—16 և այլն:

ւորք Օթման և Օդբայ: Եւ իբրև հասին ի սահմանս Հայոց՝ յերիս բաժանեալ առաջս՝ սփռեցան յասպատակս իւրեանց: Առաջ մի հատեալ ընդ կողմն Վասպուրական աշխարհին՝ առին զաւանս և զամրոցս որ մինչև ի նախջաւան քաղաք. և առաջ մի ընդ կողմն Տարօնոյ: Եվ միւս առաջն հասեալ ի Կողովիտ պաշարէին զամրոցն Արծափայ...»³¹:

Սակայն նույնը չի կարելի ասել Հովհաննես Դրասխանակերտցու և Սամվել Անեցու մասին: Ահա թե ինչ են հաղորդում նրանք.

Հովհաննես կաթողիկոս՝

«Յայնմ ժամանակի (Անաստաս կաթողիկոսի օրոք—Թ. Հ.) ասեն լինել զԿոնստանդնուպոլսի, որ ի քաղաքագիւղն Երևանի, զոր և բաւական քեզ ուսուցանեն զայնր պատերազմի զհանգամանս որ զնախ քան զմեզ զնա պատմագրեցին»³²:

Սամվել Անեցի՝

«Ով (660)՝ Երևանու կոնստանդնուպոլսի զորոյն գտցես առ պատմագրութիւնս առաջնոցն. Շապուհ և Ասողիկ յիշեն»³³:

Նրանց այդ համառոտակի, բայց միանգամայն հասկանալի վկայութիւններէց երևում է, որ արարական արշավանքների շրջանում Երևանում, բացի Սեբեոսի հիշատակածից, մեծ կոիվ է եղել նաև զրանից մի քանի տարի անց, ըստ Սամվել Անեցու՝ 660 թ.: Նույն հիշատակութիւններից դժվար չէ կոահել, որ արարական այդ արշավանքի հիմնական նպատակներից մեկը, թերևս ամենահիմնականը, Երևանի գրավումն էր: Այլապես մեր պատմիչներն այն չէին կոչի «Երևանու կոնստանդնուպոլսի»։ Այնուհետև, Սամվել Անեցին նշում է, որ այդ կովի մասին կգտնես Շապուհի (Բագրատունու) և Ասողիկի մոտ, իսկ Դրասխանակերտցին առանց իր աղբյուրների անունները տալու նշում է, որ Երևան «քաղաքագիւղում» եղած կովի մասին «բաւական» մանրամասնութեամբ հաղորդել են իրենից առաջ ապրած պատմագիրները: Այդ բոլորը մեզ բերում են այն համոզման, որ Սեբեոսի նկարագրած արշավանքը, որտեղ Երևանի մասին նշվում է միայն կողմնակի կերպով, բավարարվելով՝ «եւ եկին ժողովեցան ի յԵրևան, և մարտեան ընդ բերդին, և ոչ կարացին առնուլ» արտահայտութեամբ, նույնը չէ, ինչ որ Հովհաննես կաթողիկոսի և Սամվել Անեցու «Երևանու կոնստանդնուպոլսի»։ Նա նույն ձևով, թերևս ավելի մանրամասն, հաղորդում է նաև Որդուսպուրում, Նախճավանում և այլ տեղերում արարական արշավանքների ժամանակ մղված պատերազմների մասին, բայց զրանցից ոչ մեկը հիմք չի դարձել հետագա պատմիչների համար հատուկ նշելու «Որդուսպուրի» կամ «Նախճաւանայ կոնստանդնուպոլսի»։

Սեբեոսի և Դրասխանակերտցու ու Սամվել Անեցու հիշատակած այդ «յերեւանու»—«Երևանու» «կոնստանդնուպոլսի» իր ժամանակին իրարից յոսրբերել է նաև Ղ. Ալիշանը: Նա այդ մասին գրում է. «Եւ ետ ոչ բաղմաց՝ յամի Բ42—3. ի սկիզբն արշաւանաց Արաբացոց՝ յայտնի և ամրութիւն տեղւոյն. զի «եկին ժողովեցան ի յԵրեւան (ասէ Սեբիոս), և մարտեան ընդ բերդին և ոչ կարացին առնուլ: Յետ սակաւ եւս ամաց (658) միւս և նշանաւոր եւս կոնստանդնուպոլսի»։

³¹ Ղ և ո ն գ, էջ 11:

³² Հ ո վ հ ա ն ն ե ս Դ ր ա ս խ ա ն ա կ ե ր տ ց ի, էջ 92:

³³ «Սամուէլի քահանայի Անեցոյ, Հավաքումք ի գրոց պատմագրաց յաղագս գիտի ժամանակաց անցելոյ մինչեւ ի ներկայս ծայրաքաղ արարեալ», Վաղարշապատ, 1893, էջ 83: Տե՛ս նաև Հ ա կ ո վ ը ո ս Տ ա շ յ ա ն, Ցուցակ հայերէն ձեռագրաց մատենադարանին Մխիթարեանց ի Վիեննա, Վիեննա, 1895, էջ 292:

յՅրեւան քաղաքագեղջն, մինչեւ ի յիշատակ տարեդրութեանց անցանել դիպացն»³⁴։

Տարբերելով արաբական արշավանքների շրջանում Երևանի բերդի գրավման համար մղված այդ երկու կռիվները (որոնցից մեկը տեղի է ունեցել 643, իսկ մյուսը՝ 660 կամ 658 թ.), միաժամանակ պետք է նշել, որ դրանցից ոչ մեկի մասին մենք առաջիմ չունենք մանրամասն ու համակողմանի տեղեկություններ։ Առաջին կռիվի վերաբերյալ Սեբեոսը բավարարվել է միայն մի արտահայտությամբ, որը, ինչպես տեսանք, նույնիսկ տեղիք է տվել այդ հիշատակությունը վերագրելու Առեստավանին կամ Հերին։ Ոչնչով ավելին չեն մեր ստացած տեղեկությունները նաև երկրորդ կռիվի վերաբերյալ։ Հովհաննես Դրասխանակերտցին և Սամվել Անեցին նույնպես բավարարվում են դրա մասին մեկական արտահայտությամբ, ավելի մանրամասն իմանալու համար հղելով դեպի իրենց նախորդները։ Սամվել Անեցին այդ կռիվի պատմագրության համար նշում է երկու հեղինակ՝ Շապուհ Բադրատունուն և Ասողիկին (Ստեփանոս Տարոնացի)։ Բայց դրանցից վերջինի աշխատության մեջ (մեզ հասած վիճակով) Երևանի կռիվի մասին ոչ մի հիշատակություն չկա, իսկ Շապուհի պատմագրական երկը մեզ չի հասել։ Հավանաբար այն բավական մանրամասնությամբ էր նկարագրել «Երևանու կռիւն» ու դրա հետ կապված իրադարձությունները։

Անկախ այդ բոլորից, հենց միայն այն փաստը, որ արաբներն իրենց առաջին արշավանքների ժամանակ ընդամենը մի քանի տարվա ընթացքում երկու ճակատամարտ են մղել Երևանը գրավելու համար և այդ ճակատամարտերից մեկը կոչվել է ուղղակի «Երևանու կռիւն», ցույց է տալիս Երևանի՝ VII դարում ամուր բերդ, ռազմա-ստրատեգիական կարևոր կետ և մեծ բնակավայր (ավան կամ, Հովհաննես կաթողիկոսի արտահայտությամբ, «քաղաքադիւղն») լինելը։ Արաբները, հավանաբար, Երևանը (որը Հայաստանի 551 թ. բաժանմամբ գտնվում էր բյուզանդական մասում, պարսկա-բյուզանդական սահմանից ոչ հեռու) գրավել են հենց դրա վրա կատարած իրենց երկրորդ հարձակման ժամանակ՝ կամ 660 թ. (ըստ Սամվել Անեցու), կամ 658 թ. (ըստ Ղ. Ալիշանի հաշիվների, Այրարատ, էջ 299)՝ «Երևանու կռիւն» ժամանակ։ Հավանական է համարվում, որ Երևանը գրավելուց հետո արաբներն այն ամրացրին և դարձրին իրենց նստավայրերից մեկը³⁵, որը գտնվում էր նրանց փոխարքայական աթոռանիստ Դվինի դիմաց։ Հ. Ժամկոչյանը ենթադրում է, որ Երևանի արաբական շրջանի բերդը, որտեղ Հայաստանի մյուս բերդաքաղաքների նման զետեղված էր բավական բաղամարդ կայազոր, գտնվել է հետադայի՝ XVI—XVIII դդ. բերդի տեղում³⁶։

Զարմանալի չպետք է թվա, որ VII դ. «Աշխարհացոյցում» չեն հիշատակված ոչ Երևանը և ոչ էլ նրա շուրջն ընկած Կոտայք գավառը։ Հավանաբար այդ ժամանակներում Երևանը վարչականորեն դեռևս հաշվվում էր Այրարատյան աշխարհի նույնանուն գավառի բնակավայրերից մեկը։ Այրարատյան աշխարհի VI—VII դարերում բաժանված էր մի քանի գավառների, բայց ավանդույթի

34 Ղ. Ալիշան, նշվ. աշխ., էջ 299—300։ Հմմտ. է փրիկյան, նշվ. աշխ., հատ. I, էջ 694։

35 Ղ. Ալիշան, նշվ. աշխ., էջ 300։

36 Հ. Ժամկոչյան, նշվ. աշխ., էջ 17։

ուժով դեռևս հիշատակվում էր Այրարատյան դավառ, որպես նույնանուն աշխարհի գլխավոր դավառ: Երևանի անվան բացակայությունն այդ երկրագրական բնույթի երկում առավել ևս չպետք է տարօրինակ թվա նաև այն պատճառով, որ դրանում չեն հիշատակված Այրարատյան աշխարհի ուրիշ ոչ պակաս նշանակություն ունեցող քաղաքներն ու պատմական այլ վայրեր³⁷: Այնտեղ Այրարատյան աշխարհից հիշատակվում է փաստորեն միայն «յարքայանիստ Վաղարշապատ» քաղաքը³⁸, Երևանը չի հիշատակված նաև IX դարի արաբական հայտնի հեղինակ Բալաձորիի մոտ, որն իր աշխատության մեջ թվարկել է Հայաստանի բաղմաթիվ քաղաքներ ու գյուղաքաղաքներ³⁹: Այն չի հիշատակված և Հայաստանի քաղաքների մասին կարևոր տեղեկություն տվող Արիստակես Լաստիվերտցու մոտ⁴⁰: Բայց դրանք ևս չեն կարող մեծ տարակուսանքի տեղիք տալ: Բալաձորին օտար հեղինակ է և կարող էր Երևանի մասին նույնիսկ ոչինչ չիմանալ, իսկ Արիստակես Լաստիվերտցին, ինչպես հայտնի է, գլխավորապես հիշատակություններ ունի Անիի, Դվինի, Կարսի, Կարինի, Արծնի, Խլաթի և երկրի մեծահռչակ մյուս քաղաքների վերաբերյալ: Երևանից բացի նրա մոտ չեն հիշատակված նաև բաղմաթիվ այլ գյուղաքաղաքներ ու համեմատաբար փոքր քաղաքներ:

Վիմական արձանագրություններում Երևանն առաջին անգամ հիշատակվում է 874 թ. Սևանի Առաքելոց եկեղեցու պատի վրա: Այս արձանագրությունը հայտնաբերել է Լ. Մելիքսեթ-Բեկը 1924 թ. և հրատարակել 1938 թ.⁴¹:

Այդ 5 տողանոց արձանագրությունը Լ. Մելիքսեթ-Բեկը ընթերցել է հետևյալ կերպ.

«Կաման այ Սիւնեաց տիկին (բնադրում՝ տքն) Մարիամ շինեցի զեկեղեցիս յանուն սբ առաքելոյն՝ միաբանութեամբ (բնագրում՝ միայբանութք) (Աշոտ[ոյ] (բնագրում՝ Ոշոտ) եւ տվեք վախմ սբ առաքելոցն, զՎարսերն, զԳոմաձոր, զՅամաքաբերդ, Բերդք, Ուռե // -ացտափ, որսն զկռակծնկին, այգի ի Գառնի եւ Երեւան. և թանկագին նշան // ք ածընկալ սբ նշանաց տամ ի ժառանգութիւն զկտակելոյ (SIC) զկորատեղ, ով խափանէ՝ ՅԺԼ[ից] նզովեալ եղիցի. թվ 519»⁴²:

Նույն բովանդակությամբ հիշատակություն ունի և Ստեփանոս Օրբելյանը: Նա գրում է. «Ահա սոյն երեւմամբ վերին աղղեցութեամբ շարժեալ մեծ թագուհին Մարիամ՝ ամուսին Վասակայ Սիւնոյ, զայ առ սուրբն Մաշտոց. և բազում թախանձանօք հաւան ածեալ զնա ձեռն ի գործ արկեալ շինեն զգեղապաճոյճ եկեղեցիսն յանուն սուրբ առաքելոց, և զմիւսն, յանուն տիրուհւոյ Աս-

37 «Աշխարհացոյց է դարու» (համառոտ խմբագրություն), էջ 20: «Աշխարհացոյց Մովսեսի Խորենացոյ յավելուածութ նախնեաց» (ընդարձակ խմբագրություն), Վենետիկ, 1881, էջ 33—34: Տե՛ս նաև Ա. Առաջամյան, Անանիա Շիրակացու մատենագրությունը, Երևան, 1944, էջ 248—351:

38 «Աշխարհացոյց է դարու», էջ 20:

39 Տե՛ս «Из сочинений Баладзори «Книга завоевания стран», Баку, 1927.

40 «Պատմութիւն Արիստակեսի Լաստիվերտցոյ», Երևան, 1963:

41 Л. Мелнксет-Бек ов, Новооткрытая надпись на Севане от 874 г., «Памяти академика Н. Я. Марра (1864—1934)», М.—Л., 1938, էջ 409—415, արձ.:

42 Լ. Մելիքսեթ-Բեկ, Երևանի հիշատակությունը Սևանի 874 թ. արձանագրության մեջ. ՍՍՏՆ-ի ԳԱ Հայկական ֆիլիալի «Տեղեկագիր», № 4—5, Երևան, 1940, էջ 117—118:

տուածածնին. և զարդարեալ մեծամեծ սպասուք կանգնեն զնա տուն Աստուծոյ և բնակարան աստուածազդեաց արանց յ323 թուականին Հայոց: Բայց Մաշ-տոց եղիւր սահման վանիցն, և պայծառացոյց երկնքատակ կարգօք. յորմէ համարոյ միաբանեալ Աշոտոյ՝ իշխանաց իշխանի, սուրբ ուխտին՝ դայ ի տե-առիթին սուրբ հօրն. և ընծայէ զփրկական նշանն աստուածընկալ խաչին. և տայ ի ժառանգութիւն սուրբ եկեղեցւոյն զեօղս՝ զՎարսերն, զՅամաքարերդ, զԳոմաձորն, զԲերդքն, զՈւրկաց տափ և զորսն կռակծին, և այդիս ի Գառնի և յԵրեան և յայլ տեղիս. և բազում նշովիւք հաստատեցին»⁴³:

Օրբելլանն ունի նույն կարգի մի այլ վկայութիւն ևս, ուր նա պատմում է Մաքենիս վանքի կառուցման և նրան տրված կալվածքների ու նվիրատու-թիւնների մասին: Օրբելլանի այդ հիշատակութիւնը այն արձանագրութեան կրկնօրինակն է, որ վանքը կառուցողները փորագրել են նրա պատի վրա: Այն-տեղ ասված է (բերում ենք համառոտագրելով).

«Կաման Աստուծոյ ևս Սուրբան Սիւնեաց իշխան, շինեցի զՄաքենոցաց եկեղեցիս և անխնայաբար զարդարեցի զպատուական սպասուք և աստուա-ծային կտակարանօք. և ետու զսեփական տեղն մեք ի սա որ ըստ անուան եկե-ղեցւոյս Աստուածածին ասի, իւր ամենայն սահմանօք, լերամբ և դաշտիւ, և ետու որս ձկանց զԲողաշեն սեղանոյն, և 700 դրամ ի Դեղձանաղետոյ զապալէն, 200 դրամ ի Կթկայ, 350 յԱնմեռէն, որ լինի 1250 դրամ. ետու և 5 կուղպակս ի յԱնի և 5 այդի յԵրեան և 500 առու այդի ի դիւղաքաղաքն Գառնի, և 2 այդի յԵղեղիս, և զամենայն պէտս սուրբ եղբայրութեանս լիցի առատապէս և փար-թամացուցի ներքոյ և արտաքոյ. ետու և ջուիրս եղանց և ջոկս զուարակաց և անդեակս և հօտս ոչխարաց...»: Ահա այս իսկ էր արձան Մաքենոցաց, բայց պսն հնութեանն և խախտելոյ քարանցն ոչ կարացաք զբովանդակն իմանալ. այլ բազում բանք և տուրք իշխանացն պակասին. զայս փոքր ի շատէ եղաք զի մի՝ բնաին ջնջեալ կորիցէ յիշատակ նոցա. և այս ամենայն զործեալ եղև յ300 թուականէն (851) մինչև յ350 (901)»⁴⁴:

Բերված վկայութիւնները նախ և բոլոր ուշադրաւ են նրանով, որ դրան-ցում Երեանը հիշատակվում է ոչ թե զյուդերի հետ (Վարսեր, Յամաքարերդ, Գոմաձոր, Բերդք, Ուռաց Գոափ, Բողաշեն, Դեղձանաղետ, Կեթիկ, Անմեռ), այլ Անի քաղաքի և Գառնի ու Եղեղիս զյուդաքաղաքների շարքում՝ «և ալդիս ի Գառնի և յԵրեան», «ետու և 5 կուղպակս ի յԱնի և 5 այդի յԵրեան և 500 առու այդի ի դիւղաքաղաքն Գառնի, և 2 այդի յԵղեղիս»: Իսկ այդ ցույց է տալիս, որ երևանը IX դարում զյուդաքաղաք էր համարվում: Ըստ երևույթին, նա զյուդա-քաղաք է կոչվել զեռ VII դարում: Չէ որ Հովհաննէս կաթողիկոսը, խոսելով այդ դարի երկրորդ կեսի սկզբներին Երեանում տեղի ունեցած կռիւի մասին, ուղղա-կի գրում է, որ դրանք տեղի են ունեցել «ի քաղաքադիւղն (կամ զյուդաքաղաք—Թ. Հ.) Երեանի»⁴⁵: Իդուր են փորձում պատմագիր կաթողիկոսի՝ Երեանի որ-պիսութեան մասին այդ վկայութիւնը վերագրել նրա ասլրած շրջանին՝ IX դ. վերջերին և X դարի առաջին քառորդին: Հավանաբար նա արարական ար-

⁴³ Ս տ ե փ ա ն ո ս Օ Ր Բ Ե Լ Լ Ե Ն, Պատմութիւն նահանգին Սիսական, Թիֆլիս, 1910, էջ 173—174:

⁴⁴ Նույն տեղում, էջ 179—181:

⁴⁵ Հ ո վ հ ա ն ն է ս Դ Ե ր ա ս խ ա ն ա կ Ե ր տ ց Ի, էջ 92:

շավանքները նկարագրել է ճիշտ այնպես, ինչպես իր օգտագործած աղբյուրներն են հաղորդել, միայն դրանք համառոտագրելով: Այլ կերպ ասած, VII դարում բերդ ունեցող Երևանը միաժամանակ գյուղաքաղաք էր: Սովորական գյուղերը բերդեր չունեին: Հատկանշական է նաև այն, որ Դրասխանակերտցին, խոսելով VII դ. կեսերի դեպքերի մասին, Կոտայքը համարում է նահանգ. «և տայ բնակութիւն նմա ղգիւղն Զագ ՚ի նահանգին Կոտայից, որ ղկնի ամաց իսկ ՚ի Դվին քաղաքի ընկալաւ ղմարտիրոսական պսակն»⁴⁶: Փաստորեն Դրասխանակերտցու այս վկայութիւնն արդեն անառարկելի է դարձնում Երևանը VII դարում բերդ և նշանավոր բնակավայր՝ գյուղաքաղաք լինելը, եթե նույնիսկ Կոտայքը նահանգի փոխարեն համարենք գավառ, ավելի արժանահավատ համարելով Ստեփանոս Օրբելյանի՝ Բուղայի արշավանքների առիթով (853 թ.) կատարած հիշատակութիւնը, որի մեջ նա Կոտայքը իրոք որ համարել է գավառ. «...և Վասակ ոչ հաւատացեալ յամրութիւն բերդիցն (Սյունիքի). այլ խոյս տուեալ անց գնաց ղկողմամբ Կոտայք գավառի»⁴⁷: Իսկ միջնադարյան Հայաստանի բոլոր գավառների կենտրոնները, գրեթե առանց բացառութեան, ունեին բերդեր կամ ամրոցներ, որոնց շուրջը տարածված բնակավայրերը ճնշող մեծամասնութեամբ ոչ թե հասարակ բնակավայրեր էին, այլ քաղաքներ կամ գյուղաքաղաքներ: Այսպիսով, այս անուղղակի փաստերը նույնպես գալիս են ասելու, որ Կոտայք «նահանգի» — գավառի կենտրոնը պետք է որ լիներ Երևանը, նա գավառի ամենահայտնի բնակավայրն էր և ուներ բերդ: Հետևապես անընդունելի է որոշ հեղինակների այն տեսակետը, որ իբր մինչև X և նույնիսկ XII—XIII դարերը Երևանը հասարակ բնակավայր էր:

Նախորդ դարերի նման Երևանի բնակչության հիմնական ղբաղմունքներից մեկը, թերևս ամենահիմնականը, այգեգործութիւնն էր: Վկայակոչված փաստերից պարզ երևում է, որ Երևանը Գառնիի նման հայտնի էր իր այգիներով և որ մի քանի վանքեր այնտեղ ունեին այգիներ: Անշուշտ, այգեգործութեան հետ միասին Երևանում ղբաղվում էին գյուղատնտեսութեան նաև այլ ճյուղերով, բայց մեր պատմագիրները դրանց մասին, առիթ չունենալով, ոչինչ չեն հաղորդել: Իբրև գյուղաքաղաք Երևանում կային արհեստավորներ. որոնց մեծ մասն արհեստի հետ միասին ղբաղվում էր նաև գյուղատնտեսութեամբ: Հավանաբար բավական կարևոր տեղ էր գրավում առևտուրը: Երևանը առևտրա-տնտեսական առումով հարմար դիրք ուներ հնագույն ժամանակներից ի վեր: Այս տեսակետից նրա դիրքն ավելի նպաստավոր է դառնում արաբական տիրապետութեան սկզբնական շրջանում, երբ նրա վրայով Հայաստանի մայրաքաղաք Դվինը կապվում է Աղվանքի մայրաքաղաք Պարտավի հետ: Հ. Մանանդյանը Հովհաննես Դրասխանակերտցու, Ստեփանոս Օրբելյանի և ուրիշ պատմագիրների վկայութիւնների ու այլ կարգի աղբյուրների հիման վրա համոզիչ կերպով պարզել է այդ երկու մեծ քաղաքներն իրար հետ միացնող կարևոր ճանապարհի հին ուղղութիւնը՝ Դվին—Պարտավ—Բերդկունք (Սևանա լճի հարավային ափին)—Կոթ ավան (այժմ՝ Ներքին Գետաշեն գյուղ Մարտունու շրջանում)—Զողի լեռնանցք—Կաղանկատու ավան (Տրտու թարթառ գետի ափին)—Պարտավ (Թարթառ գետի ստորին հոսանքի ափին,

⁴⁶ Նույն տեղում, էջ 92:

⁴⁷ Ստեփանոս Օրբելյան, էջ 170:

ներկայումս Ադրբ. ՍՍՀ Բարդա շրջկենտրոնի մոտ)⁴⁸։ Այդ ճանապարհը հիմնականում համընկնում էր այժմյան Երևան—Սևան—Կամո—Մարտունի—Զոդի լեռնանցք—Բարդա ճանապարհի հետ։ Նրա վրա գտնվող զրեթի բոլոր կայանները՝ Բերդկունքը, Կոթը և մյուսները ոչ միայն տարանցիկ առևտրի կետեր էին, այլև իրենց սեփական ապրանքներով որոշ մասնակցություն ունեին այդ առևտրին։ Այդ հավասար չափով կարող է վերաբերել նաև Երևանին, չնայած որևէ փաստ չկա վերջինիս առևտրի ծավալի, բնույթի և ապրանքների կազմի մասին։

Հնագույն և ուրարտական ու աքեմենյան ժամանակաշրջաններին վերաբերող (հողի տակ ծածկված) հուշարձանները չհաշված, Երևանի մեզ հայտնի նշանավոր ամենահին կոթողը Պողոս-Պետրոս եկեղեցին էր, որը գտնվում էր այժմյան «Մոսկվա» կինոթատրոնի տեղում և քաղաքի վերակառուցման ու փերայլանավորման պատճառով քանդվել է 1931 թ.։ Մինչ այդ, Պողոս-Պետրոսը սովորաբար համարում էին XVII դարի (1690 թ.) կառուցվածք։ Բայց քանդելու հետ միաժամանակ կատարված հնագիտական ուսումնասիրությունները Աշխարհբեկ Քալանթարին բերեցին այն համոզման, որ այդ եկեղեցին Եախապես իրենից ներկայացրել է V—VI դարերին հատուկ բաղիլիկա և չնայած հետագայում մի շարք անգամ ենթարկվել է նորոգումների, իսկ «1679 թվի երկրաշարժից հետո կիսով չափ» վերակառուցվել է, «բայց նա իր ներքին մասում դեռևս պահել է հարադատորեն V դարու բաղիլիկայի առանձնահատկությունները»⁴⁹։ Ճիշտ է նշում հեղինակը, Պողոս-Պետրոսի ճարտարապետական ոճի ու կառուցման ժամանակի հարցի լուծումը միանգամից հնարավորություն տվեց «մեր աչքի առաջ դնել» պատկերացնել «Երևան քաղաքի հեռավոր կուլտուրական անցյալը»⁵⁰։

Քանզման ժամանակ հնությունների պահպանության կոմիտեի հանձնարարությամբ բավական մանրամասնությամբ նկարագրել, չափադրել և ուսումնասիրել են այդ տաճարը։ Նրա պատերի վրա կային մի շարք արձանագրություններ, որոնք վերաբերում են XVII, XVIII և XIX դարերին։ Հնագիտական և պատմա-մշակութային տեսակետից առանձնապես մեծ հետաքրքրություն են ներկայացրել իրար վրա վեց շերտ կաղմող որմնանկարները, չհաշված ամենավերին շերտի կտավի վրա արած նկարը։ Ներքևից հաշված 5-րդ շերտի վրա թվագրված էր հայոց 580 թ. (1131 թ.)։ Նկարները հղել են ֆիգուրային ու ծաղկանկարներ, զծված յուղաներկով և էմուլսիոն-լաքով, բազմագույն։ Շերտերն իրարից բաժանելու և դրանք նկարչական տեսակետից պատշաճ ուսումնասիրության ենթարկելու համար տեղական ուժերից բացի Մոսկվայից հրավիրվում է նաև ականավոր նկարիչ-վերականգնող Զիրիկովը։ Եկական աշխատանքը տալիս է ցանկալի արդյունքներ։ Պարզվում է, որ ներքևից հաշված այդ որմնանկարների առաջին և երկրորդ շերտերը շատ հին ծագում ունեն՝ վերաբերում են VI—VII դարերին և, իբրև այդպիսին, մշակութային առումով առանձնահատուկ արժեք են ներկայացնում։ Դրանք բացառիկ են ինչպես մշակույթի պատմության, այնպես էլ կատարման տեխնիկայի

⁴⁸ Հ ա կ ո Ր Մ ա ն ա ն դ յ ա ն, նշվ. աշխ., էջ 181—182, նույնի՝ О торговле и городах Армении в связи с мировой торговлей древних времен (V век до н. э.—XV в. н. э.), 1954, էջ 197 և 255։

⁴⁹ «Հայաստանի հնությունների պահպանության կոմիտե», Երևան, 1931, էջ 11։

⁵⁰ Նույն տեղում։

տեսակետից: Այդ որմնանկարների ուսումնասիրությամբ, Զիրիկովից բացի, պահպանվել են նաև Աշխարհբեկ Քալանթարը, դերմանացի Շուլցը, պրոֆ. Ն. Մառը, Հ. Քյուրտյանը, Տարադրոսը: Որմնանկարների առաջին կամ հնա-
յույն խավը ծաղկանկար է, իսկ մյուս խավերը՝ մարդանկարներ: Առաջին խավը ժամանակագրական տեսակետից վերագրել են V—VI, իսկ երկրորդը VI—VII դարերին⁵¹:

VI—VII դարերում Երևանում որմնանկարչության գոյությունը թույլ է տալիս Ա. Հովհաննիսյանին ենթադրելու, որ այդ ժամանակներում Ավանի և Զվարթնոցի նման Երևանը ևս, որը գտնվում էր դրանց արանքում, կարող էր դարձած լինել հայ քաղկեղոնականների հանգրվաններից մեկը, որովհետև, ինչպես նա նկատում է, VII դարում հայ լուսավորչական եկեղեցականների համար որմնանկարչությունը հատկանշական չէր⁵²: Սակայն պետք է ենթադրել, որ Երևանում այդ շրջանում քաղկեղոնականների ազդեցությունը, եթե գոյություն էլ ունեցել է, մեր կարծիքով տեական կամ իշխող չի եղել, որովհետև, ինչպես տեսանք, Երևանի հոգևոր ներկայացուցիչ Դավիթը ևս մասնակցում էր VII դարի սկզբներին Դվինի հակաքաղկեղոնական ժողովին:

Երևանի հայկական այդ հնագույն կարևոր կոթողի բնութագրման համար, որմնանկարներից բացի, կարևոր նյութ են ծառայել նաև այն քանդակազարդ և հետազայում սվաղով ծածկված քարերը, որոնք հայտնաբերվեցին տաճարի քանդման ժամանակ: Մասնագետները գտնում են, որ դրանք V—VII դդ. Պողոս-Պետրոս տաճարի քարերից են, որոնք հետազայում օգտագործվել են նույն եկեղեցու վերանորոգումների ու վերակառուցումների ժամանակ⁵³:

Միանգամայն ընդունելի է Հ. Քյուրտյանի այն հետևությունը, թե՝ «պատմա-գեղարվեստական տեսակետով այս նյութը կարևոր ըլլալն զատ, կարևոր է պատմական տեսակետով, Երևան կհայտնվի իբր հին և մշակույթ ունեցող հայրաքաղաք մը, քաղաքին մոթ անցյալը իր մեկ տարբեր փուլին մեջ կլուսավորվի, և այսպես քանդվող Պողոս-Պետրոս եկեղեցին ցույց կուտա, որ Երևանի մեջ V—VI դարերուն կար ճարտարապետական նկատելի կերտվածք, քանդակագործության նմուշներ, ու կհաստատվի նաև ուրիշ տեղերե միայն սովանդությամբ ծանոթ նկարչության անժխտելի գոյությունը հոն»⁵⁴:

Հետազայում Գառնիի, Արին-բերդի, Կարմիր-բլուրի և այլ վայրերի պեղումների ընթացքում հայտնաբերվեցին ուրարտական ու հուրարտական հնագույն ժամանակներին վերաբերող խճանկարչության և որմնանկարչության անդուգական նմուշներ, բայց դրանք ամենևին չեն արժեզրկում Երևանի Պողոս-Պետրոս տաճարի որմնանկարները: Ընդհակառակը, դրանք միայն հաստատում են, որ արվեստի այդ ճյուղը Հայաստանում զարգացման է հասել հնա-
յույն ժամանակներից: Եվ մեր մայրաքաղաք Երևանն էլ իր բաժինն ունի այդ արվեստի զարգացման մեջ:

⁵¹ Մանրամասն տե՛ս նույն տեղում. նաև Հ. Քյուրտյան, Նորագյուտ հին որմնանկարներ Երևանի Սուրբ Պողոս-Պետրոս եկեղեցվում, «Անահիտ» հանդես, Փարիզ, 1932 Նոյեմբեր—1933 ապրիլ, № 3—6, էջ 56—63:

⁵² Այդ տեղում Հովհաննիսյան, Դրվագներ հայ ազատագրական մտքի պատմության, գիրք առաջին, Երևան, 1957, էջ 484:

⁵³ Տե՛ս «Անահիտ» հանդես, 1932 Նոյեմբեր—1933 ապրիլ, № 3—6, էջ 57—59:

⁵⁴ Նույն տեղում, էջ 62:

ЕРЕВАН В VII—IX ВЕКАХ

Проф. Т. Х. АКОПЯН

(Резюме)

В армянских летописях и различных надписях Ереван упоминается с начала VII в. Из ряда свидетельств, относящихся к VII в., видно, что Ереван в то время был поселением городского типа и имел свою крепость, для захвата которой арабы в период своих нашествий в 642—643 гг. и в 658 или 660 гг. предприняли две кровопролитные битвы. В надписях Ереван впервые упоминается в 874 г. (надпись церкви Аракелоц Севанского монастыря). Из этого, а также из двух сведений историка Степаноса Орбеяна становится ясным, что в хозяйстве Еревана главное место занимало садоводство и что сады тогда являлись предметом дарствования. Город находился на караванной дороге Двин—Партав и играл значительную роль в транзитной торговле.

Известным архитектурным сооружением того времени был монастырь Погос—Петрос (св. Павла и Петра), находившийся на месте нын. кинотеатра «Москва» и снесенный в связи с реконструкцией города в 1931 г. Монастырь этот был известен своими шестислойными фресками, из коих нижние три слоя были сделаны в VI—IX вв. Фрески Погос—Петроса вместе с древними фресками, обнаруженными в развалинах крепостных городов Эребуни (Арин-берд) и Тейшебани (Кармир-блур), показывают, что Ереван внес большой вклад в развитие этой области искусства.